



XUNTA DE GALICIA

CONVENIO ENTRE A CONSELLERÍA DE MEDIO AMBIENTE E ORDENACIÓN DO TERRITORIO E O CONCELLO DE O BARCO DE VALDEORRAS PARA A RENOVACIÓN DE INFRAESTRUTURAS NA AVDA. DA DEPUTACIÓN NO TRAMO COMPRENDIDO ENTRE A RÚA DA CONSTITUCIÓN E O PONTÓN SOBRE O ARROIO DE VEIGADECABO.

Santiago de Compostela, a 27 de abril de 2016

RE UN I D O S

Dunha parte, a Sra. D^a _____, Conselleira de Medio Ambiente e Ordenación do Territorio da Xunta de Galicia, nomeada polo Decreto 122/2015, do 4 de outubro, no exercicio das atribucións que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Pola outra parte, don _____, Alcalde-Presidente do Concello de O Barco de Valdeorras, no exercicio das atribucións conferidas no artigo 21 da Lei 7/1985, do 2 de abril, reguladora das Bases de réxime local.

Ámbalas dúas partes recoñécense mutuamente, na calidade en que interveñen, capacidade legal suficiente para o outorgamento deste convenio e para o efecto,

E X P O Ñ E N

I.- O Concello de O Barco de Valdeorras (Ourense) trata de promover unha actuación consistente na **“renovación de infraestruturas na Avda. da Deputación no tramo comprendido entre a rúa da Constitución e o pontón sobre o arroio de Veigadecabo”**, situada no núcleo urbano.

Recentemente efectuouse a renovación de infraestruturas na Avenida da Deputación, no tramo comprendido entre a rúa A Veiguiña e a rúa da Constitución, quedando pendente de renovación o tramo comprendido entre esta última e o pontón sobre o arroio de Veigadecabo, o cal conta cunhas infraestruturas de saneamento e abastecemento en deficiente estado de conservación debido á súa antigüidade, o que implica numerosas roturas e fugas, cos conseguintes inconvenientes aos usuarios de ditos servizos. Á súa vez, os materiais que forman a rede de abastecemento atópanse fora de normativa ao ser estas de fibrocemento.

Así mesmo, a rede de abastecemento existente conta con escaso diámetro, e á súa antigüidade redunda nun elevado número de avarías por roturas, que impiden o correcto servizo aos usuarios.

As numerosas avarías e cortes de subministro producidas polas condicións anteriormente descritas, implican frecuentes roturas do pavimento existente para poder proceder a realizar as reparacións pertinentes, polo que este, atópase parcheado en numerosas zonas, co conseguente inconveniente e perigo á circulación rodada.



XUNTA DE GALICIA

II.- Descrición das actuacións a realizar:

- Farase a substitución do colector de saneamento existente de formigón vibrado de sección 300 mm, por unha tubaxe de PVC de 315 mm de diámetro, conectada á rede xeral de saneamento do casco urbano.
- Efectuarase o cambio da tubaxe da rede xeral de abastecemento, substituíndo a actual de fibrocemento de 100 mm. de diámetro por unha de Polietileno de alta densidade PE100, de 110 mm. de diámetro nominal e unha presión nominal de 10 bar. A rede de distribución actual é de PVC de baixa densidade de 75 mm. de diámetro, a cal, so está instalada nalgúns tramos conectados á rede xeral, o que dificulta as labores en caso de avaría xa que a rede non está mallada.
- Realizarase o soterramento da rede de alumeado público, xa que a actual está cosida ás fachadas, sendo aérea entre os diferentes báculos
- Como consecuencia da renovación das infraestruturas anteriormente indicadas, é necesario a demolición do pavimento existente. En consecuencia procederase a realizar unha mellora de todo o firme, incrementando o seu espesor e procederase, así mesmo á construción de novas beirarrúas similares ás existentes na zona.

III.- Nos orzamentos da Consellería de Medio Ambiente e Ordenación do Territorio para o ano 2016 figura consignación orzamentaria adecuada para acometer a actuación. A competencia para o desenvolvemento destas actuacións, está contemplada no apartado m) do artigo 10º.1 do Decreto 167/2015, do 13 de novembro, polo que se establece a estrutura orgánica da Consellería “*A realización de actuacións de mellora de contornas urbanas, de accesibilidade e supresión de barreiras arquitectónicas e de equipamentos públicos que teñan por finalidade a revitalización do territorio e o reequilibrio territorial*”.

IV.- Polo exposto, a Consellería de Medio Ambiente e Ordenación do Territorio, no exercicio das súas competencias, e o concello de O Barco de Valdeorras, no exercicio das que lle atribúe a súa lexislación específica, manifestan a súa vontade de formalizar unha colaboración, para abordar a execución das obras citadas, a través dun convenio que se estrutura nas seguintes

CLÁUSULAS

PRIMEIRA. OBXECTO

O obxecto do presente convenio é establecer as bases de colaboración e cooperación técnica e económica entre a Xunta de Galicia e o concello de O Barco de Valdeorras, que permitan acometer e incorporar ao patrimonio público municipal as obras consistentes na “**renovación de infraestruturas na Avda. da Deputación no tramo comprendido entre a rúa da Constitución e o pontón sobre o arroio de Veigadecabo**”.



XUNTA DE GALICIA

SEGUNDA. COMPROMISOS DO CONCELLO

O Concello de O Barco de Valdeorras comprométese a:

- 1.- Poñer a disposición da Consellería de Medio Ambiente e Ordenación do Territorio, os terreos necesarios, libres de cargas e gravames e co réxime urbanístico adecuado, para a execución das obras a que se refiren as actuacións descritas na cláusula primeira, así como a reposición de servizos e servidumes. Así mesmo, asumirá a realización das xestións pertinentes, ante os organismos que correspondan, para a obtención dos permisos, licencias e autorizacións regulamentarias, correndo cos custos que se xeren, entre os que non haberá liquidación algunha de tributo municipal, a que puidera dar lugar a execución das obras, ao ser o concello o titular das mesmas.
- 2.- Levar a cabo as actuacións consistentes na redacción dos documentos técnicos que definan as obras a executar. Prestarlle a aprobación aos indicados documentos nun prazo máximo de 15 días, contados dende a data de requirimento, así como á remisión de todos aqueles informes que resulten precisos para a licitación e contratación das obras. Noutro caso, a Consellería de Medio Ambiente e Ordenación do Territorio poderá deixar sen efecto os compromisos adquiridos no presente Acordo, sen mais trámites que a comunicación ao concello.
- 3.- Asumir, unha vez realizadas as obras, e logo da comunicación da Consellería de Medio Ambiente e Ordenación do Territorio, a explotación e conservación das mesmas.
- 4.- Antes da sinatura do presente convenio, o concello deberá achegar ao órgano de contratación da Consellería de Medio Ambiente e Ordenación do Territorio, os compromisos a que fan referencia os apartados 1, 2 e 3 anteriores.
- 5.- O concello, como trámite previo á licitación das obras, aportará a oportuna certificación xustificativa da dispoñibilidade dos terreos, nos termos do apartado 1 precedente.

TERCEIRA. COMPROMISOS DA XUNTA DE GALICIA

A Xunta de Galicia, a través da Consellería de Medio Ambiente e Ordenación do Territorio, asume os seguintes compromisos:

- 1.- Financiar a execución das obras segundo as prescricións do proxecto, destinando para isto, con cargo á aplicación 07.02.521A 607.1, **douscentos oitenta mil seiscientos vinte e tres euros con setenta e nove céntimos (280.623,79 €)**, distribuídos nas seguintes anualidades:

- 2016	130.000,00
- 2017	150.623,79

- 2.- Levar a cabo, as actuacións consistentes na contratación da execución e dirección das obras, a xestión das mesmas ata completar a súa finalización conforme aos proxectos aprobados e formalizar os actos de recepción de conformidade co estipulado no artigo 235 do Texto Refundido da Lei de Contratos do Sector Público aprobado polo Real Decreto Lexislativo 3/2011, do 14 de novembro.



XUNTA DE GALICIA

As actuacións expresadas abarcan, se fose o caso, as execucións de proxectos modificados, complementarios, revisións de prezos e proxectos de liquidación ata que as construcións merezan a plena conformidade da Consellería de Medio Ambiente e Ordenación do Territorio, por producirse o acto formal de recepción e atoparse en condicións de ser entregadas ao concello de O Barco de Valdeorras para a súa incorporación ao servizo e uso público.

3.- Unha vez producido o acto formal de recepción das obras pola Consellería de Medio Ambiente e Ordenación do Territorio, esta poñerá en coñecemento do concello de O Barco de Valdeorras, entendéndose que tal comunicación determina o nacemento da obriga asumida polo concello na cláusula segunda 3) precedente, sen prexuízo da posterior formalización da correspondente acta de entrega.

CUARTA.- RELACIÓN LABORAL

A subscrición do presente convenio non implica relación laboral, contractual ou de calquera tipo con carácter indefinido, entre os profesionais que desenvolvan as actividades e a Consellería de Medio Ambiente e Ordenación do Territorio, de tal xeito que non se lle poderá esixir responsabilidade ningunha, nin directa, nin subsidiaria, polos actos ou feitos ocorridos no desenvolvemento deste.

QUINTA.- COMISIÓN DE SEGUIMIENTO.

Para o impulso e seguimento das accións establecidas no presente convenio, créase unha Comisión, integrada por catro membros, dous por cada unha das partes asinantes do presente acordo. Formarán parte pola consellería, a persoa titular da Secretaría Xeral de Ordenación do Territorio e Urbanismo ou persoa en quen delegue, e a persoa titular do Servizo de Obras e Supervisión de Proxectos; o concello estará representado polo Alcalde ou persoa en quen delegue e o concelleiro responsable de obras e/ou infraestruturas.

SEXTA.- INTERPRETACIÓN E NATUREZA

1.- As dúbidas que se presenten na súa interpretación, caso de discrepancias, serán resoltas, visto o informe da Comisión de Seguimento, pola persoa titular da Consellería de Medio Ambiente e Ordenación do Territorio, poñendo así fin á vía administrativa.

2.- O presente convenio ten natureza administrativa e tramítase ao abeiro do Decreto 246/1992 do 30 de xullo, polo que se regulan determinadas condicións da execución de obras públicas en réxime de cooperación coas corporacións locais ou outros entes de dereito público. A xurisdición contencioso-administrativa será competente para o coñecemento de posibles cuestións litixiosas que poidan suscitarse como consecuencia do mesmo.

O presente convenio obriga ao cumprimento do expresamente pactado, someténdose as partes ao acordado en todas as estipulacións, aplicándose os principios do Texto Refundido da Lei de Contratos do Sector Público aprobado polo Real Decreto Legislativo 3/2011 do 14 de novembro, para resolver as dúbidas e lagoas que poidan presentarse (artigo 4.2).



XUNTA DE GALICIA

SEPTIMA.- CAUSAS DE RESOLUCIÓN

Son causas de resolución do convenio:

- a)** O cumprimento do seu obxecto
- b)** O incumprimento de calquera das cláusulas.
- c)** A inviabilidade da realización das actuacións descritas no mesmo por causas non imputables ás partes.
- d)** O incumprimento de carácter temporal ou parcial de calquera das cláusulas do mesmo. Entenderase por incumprimento parcial, aquel que implique en maior ou menor grao a non consecución dos fins propios do convenio ou impidan de xeito directo ou indirecto o desenvolvemento das actuacións previstas.
- e)** A denuncia, por calquera das partes, por razóns de interese público.

OITAVA.- VIXENCIA

A vixencia do presente Convenio esténdese ata o 31 de decembro de 2017. Non obstante manterase ata a entrega das obras ao concello de O Barco de Valdeorras nos termos establecidos na cláusula terceira. Así mesmo, seguirá producindo efectos en tanto non se liquiden as obrigas que puideran quedar pendentes.

E en proba de conformidade asinan o presente documento por triplicado exemplar no lugar e data do encabezamento.

POLA XUNTA DE GALICIA
A Conselleira de Medio Ambiente e Ordenación
do Territorio

POLO CONCELLO DE O BARCO DE
VALDEORRAS
O Alcalde